


Mennuti: Mostar je pozitivan i ohrabrujući primjer u BiH



Prvi zamjenik visokog predstavnika i supervizor za Brčko Distrikt Jonathan Mennuti posjetio je u četvrtak Mostar prvi put u službenom svojstvu prvog zamjenika visokog predstavnika. On je iskoristio ovu priliku da održi nastupne sastanke sa predstavnicima gradske uprave i političkih stranaka.

Na odvojenim sastancima sa glavnom savjetnicom Gradske uprave Mostara Radmilom Komadinom i predsjednikom i potpredsjednikom Gradskog vijeća Mostara Salemom Marićem i Veliborom Milivojevićem, prvi zamjenik visokog predstavnika Mennuti informirao se o radu gradske uprave i ključnim izazovima sa kojima se ona suočava.

Prvi zamjenik visokog predstavnika Mennuti rekao je da Mostar djeluje kao pozitivan i ohrabrujući primjer u BiH, zahvaljujući novoj posvećenosti cjelokupne uprave da zajedno radi na očuvanju kohezije grada, kao simbola multikulturalnog života. On je pozvao sugovornike da ulože veće napore u suzbijanje korupcije i nepotizma u zapošljavanju u javnom sektoru i stvaranju uslova kako bi mladi odlučili ostati i živjeti u Mostaru.

Mennuti je imao i odvojene sastanke sa predsjednikom HDZ-a BiH Draganom Čovićem i predsjednikom HRS-a BiH Slavenom Ragužem, na kojima su razmijenili mišljenja o trenutnoj političkoj situaciji i ishodu općih izbora, kao i o postizbornim reformskim prioritetima za napredak zemlje.

Na kraju posjete, prvi zamjenik visokog predstavnika Mennuti posjetio je Partizansko spomen-groblje u Mostaru, koje je u junu oštećeno u vandalskom činu. Mennuti je istaknuo važnost poštovanja antifašističkog naslijeđa BiH i pozvao vlasti da pronađu održivo rješenje za osiguranje ove lokacije u budućnosti.